



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL**

Komunikadu Imprensa

21 Marsu 2013

Tribunál kondena pena multa ba arguidu kazu violénsia doméstika

Iha 20 Marsu 2013 Tribunál Distritál Díli fô pena multa \$180 ba arguidu ne'ebé komete violénsia doméstika hasoru nia feen.

Ministériu Públiku akuza katak iha 3 Outubru 2010 arguidu baku no rasta lezada nia fuuk to'o nia monu ba rai. Iha Novembru 2010 arguidu kontinua komete tan krime hasoru lezada hanesan baku lezada ho fiu-eletridade dala barak iha lezada nia kotuk laran to'o rezulta kanek.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

“JSMP hanoin katak apropiadu liu atu trata krime ne'e ho maus tratus ba kónjuje tuir artigu 154 Kódigu Penál, tanba iha evidénsia katak arguidu repete krime violénsia doméstika hasoru nia feen,” dehan Diretór Ezekutivu JSMP Luis de Oliveira Sampaio.

Iha alegasaun finál Ministériu Públiku deklara katak kazu ne'e konsidera hanesan maus tratus ba konjúje, maibé akuza ho ofensa ba integridade fízika simples tanba laiha kauza grave. Ministériu Públiku husu ba tribunál kondena arguidu ho pena konkreta tinan 1 maibé suspende ba tinan 2.

Iha parte seluk, Defeza dehan katak tanba arguidu konfesa ona, iha konsiliaun iha família no arguidu iha oan lima, tanba ne'e husu ba tribunál atu kondena arguidu ho pena multa deit.

“JSMP la konkorda katak krime ne'e la grave. Violénsia doméstika sempre iha impaktu boot ba vítima, nia oan sira no ba sosiedade.”

Tribunál decide aplika pena multa \$180 – ba loron 180, kada loron \$1. Karik kondenu la kumpri pena multa sei kondena ba prizaun loron 120 no selu kusta judisiál \$10.

Kazu ne'e rejista iha tribunál ho Númeru Prosesu: 0246/2012/PDDIL. Julgamentu prezide husi juis Dr. Julio Gantes (Juis Internasionál), Dr. Vicente Brites representa Ministériu Públiku no arguidu hetan defeza husi Dr. Manuel Exposto husi Eskritóriu Defensória Públiku.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883 / 77810637

www.jsmp.tl